

La'o Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-3321040 or +670-77234330 (mobile) email: laohamutuk@gmail.com

Website: www.laohamutuk.org



Dili, 23 Julu 2020

Bodik ba : Distintu Deputadu/a sira iha Komisaun C no Komisaun D,
Parlamentu Nasionál RDTL


Asuntu : Hato'o apresiasaun no ofere se kontribuisaun analítiku ba Distintu
Deputadu/a sira iha prosesu lejislasaun liu-liu iha Prosesu OJE 2020
no 2021

Ho respeito,

ONG La'o Hamutuk dékada rua ona, ajuda Timor-Leste nian prosesu dezenvolvimentu. Ami halo monitoring, analiza no halo advokasia bazeia ba evidénsia no realidade loloos povu nian, ajuda mós públiku atu komprende no partisipa prosesu polítiku ne'ebé la'o iha Timor-Leste. Ami rekomenda tinan barak atu Timor-Leste la'o iha diresaun ekonómiku ida ne'ebé forte, ekitável no sustentável, diresaun ekonómiku ida ne'ebé ativamente envolve populasan no utiliza rekursu uitoan ne'ebé iha ho loloos ba sidadaun sira ne'ebé merese liu atu hetan.

Ami hakerek atu hato'o parabéns no apresiasaun ba devér foun ne'ebé distintu/a sira assume hafoin akontese mudansa polítika iha ita nia rai doben. Mudansa ida ne'ebé mai ho situaun inserteza ekonomia iha nivel global ne'ebé ninian konsekuénsia ita haree momoos hela no afeta ona ba ita nia ekonomia.


Too agora, Timor-Leste nia ekonomia depende maka'as husi reseita mina no gás nian, ida ne'ebé la barak no la sustentável, Kampu boot mina no gás ne'ebé durante ne'e fó osan ba Fundu Petróleu mak Bayu-Undan, relatóriu sira hatudu katak kampu ida ne'e labele fó osan barak ona kompara ho tinan sira antes no produsaun sei para iha tinan hira tuir mai ka lalais liu.



Grafiku husi La'o Hamutuk bazeia Relatoriu Anual sira husi Santos. Fevreiru 2020
Dadus hafoin 2019 projesaun husi La'o Hamutuk.


Maske situasaun investimentu Fundu Petrolíferu rekupera uitoan hafoin negativu iha fulan Fevreiru-Abríl, maibé laiha serteza ba futuru ne'ebé ita sei hasoru iha merkadu finanseiru. Hanesan ita-boot sira hatene, situasaun ida ne'e kauza husi surtu global Covid 19, ida ne'ebé too agora seidak iha rohan ka seidak iha ai-moruk loloos atu kura ba moras ida ne'e. Laiha ema ida ne'ebé bele hatene bainhira mak situasaun ekonómiku mundiál bele atinje fali nivel estavel ka normal.

Mudansa iha espetasaun balansu Fundu Petrolifeiru bainhira tinan 2020 remata, karik situasaun la'o nafatin husi kada data



Projesaun husi La'o Hamutuk bazeia ba S&P500, presu mina Brent, no funan titulu E.U.A. nian. 21 Julhu 2020

Folin mina "Brent Spot" (USD/Barril)



Timor-Leste hetan ona reseita boot liu iha 2011 -2013 iha momentu ne'ebá folin mina boot liu dala tolu kompara ho agora, hanesan iha gráfiku hatudu folin mina atuál kí'ik tebes, maski iha possibilidade folin mina bele dí'ak fali iha futuru maibé ida ne'e sei la fó ba Signifikasaun ba reseita Bayu Undan tanba rezerva hela uitoan no atu maran iha tempu besik. Dala ida tan hakarak subliña katak ho pandemia global ne'ebé seidauk iha rohan maka sei kontinua laiha serteza ba senáriu makro ekonomia global inklui folin mina no merkadu investimentu mós sei la estavel.

Iha fulan ida liu ba, La'ó Hamutuk hakerek ba komisaun rekuperasaun ekonómiku ne'ebé lidera husi Dr. Rui Gomes, ami sujere atu rekomenda ba Konsellu Ministru atu adopta direasaun ekonómiku ne'ebé liga ba povu nia qualidade moris, investe ba bee no saneamentu, hadi'ak liu tan qualidade edukasaun no saúde, investe barak liu ba iha setór agrikultura ne'ebé bele ajuda hamenus problema malnutrisaun, hamenus pobreza no kria oportunidade servisu ka promove auto empregu barak no permanente inklui redús número importasaun.

Iha karta ne'e, ami mós husu atu kansela no suspende Projeitu Tasi Mane no projeitu petrolíferu sira seluk, ida ne'e la'ós de'it tanba taka oportunidade beibeik atu investe iha setór produtivu no sustentável sira maibé mós pandemia global ne'e hamosu difikuldade boot iha kompañia petrolíferu sira, laiha finansiamentu ba investimentu sira no sei la fó vantajen dí'ak ba povu nian seguransa ba tempu naruk. Timor-Leste gasta ona tokon \$500 ba projeitu Tasi Mane, no fó empresta tokon \$670 tan. Maibé ita mós bele salva ita nia Fundu tokon \$17,500 se bainhira ita kansela no decide atu suspende projeitu ne'e agora. Laiha justifikasaun atu kontinua gasta povu nia osan bainhira laiha probabilidade atu hetan retornu adekuadu.

| Osan gastu ona, iha orsamentu no sei presiza atu hari'i Projeitu Tasi Mane (tokon dolar EUA) | | | | | | | |
|--|---------------|---|-----------------|----------------|---------------------|------------------------------|----------------------|
| Komponente | Fatin | Estatus | Gastu to'o 2019 | Alokasaun 2020 | Alokasaun 2021-2024 | Kustu total kapitál estimadu | Persen-tajen iha OJE |
| Aeroportu | Suai | Harii tiha ona | 75 | 9 | 4 | 100 | 88% |
| Baze Fornesimentu | Suai | Hein aprovizionamentu | 51 | 5 | 705 | 850 | 89% |
| Auto-estrada | Suai-Fatukai | Harii tiha ona | 305 | 4 | 4 | 340 | 92% |
| Auto-estrada | Fatukai-Beaçu | Seidauk hahú | 3 | 4 | 18 | 1,320 | 2% |
| Aeroportu | Viqueque | Seidauk hahú | - | - | - | 75 | 0% |
| Refinaria no pipa mina | Betano | Seidauk dezeñu | 3 | 5 | 6 | 1,500 | 1% |
| Pipa gas, planta LNG no portu | Sunrise-Beaçu | Seidauk dezeñu | 12 | 35 | 19 | 6,000 | 1% |
| Hola partisipasaun 57% iha Konsorsiu Greater Sunrise | Tasi laran | Empresta husi Fundu Petrolifeiru direktamente | 650 | | - | 650 | 100% |
| Funan ba emprestimu atu hola partisipasaun iha GS | Tasi laran | Aumenta iha Fundu Petrolifeiru | 21 | 30 | 135 | 512 | 36% |
| 57% husi investimentu kapitál iha Sunrise upstream | Tasi laran | | - | 25 | - | 6,840 | 0% |
| Kustu administrasaun no sst. | Dili | | 64 | 10 | - | 500 | 15% |
| TOTAL | | | 1,184 | 126 | 889 | 18,687 | 12% |

Tabela husi La'ó Hamutuk bazeia ba Livru Orsamentál 2018, 2019 no 2020, proposta husi TimorGAP, Portal Transparénsia, no ami nia estimasaun. Maiu 2020

Ita nia realidade kada tinan dala barak montante OJE too biliaun ida ho balun, parte boot liu husi orsamentu estadu no barak liu ba de'it despeza rekorente no kustu administrativu, ne'ebé kada tinan iha tendénsia atu sae. Nune'e, Governu nafatin ho presaan boot no laiha alternativu hodi kontinua mantén no kuaze laiha indikasaun atu redús.


Nudár ita-boot sira hatene hafoin resesu no tama ba sesaun foun Parlamentu Nasionál nian, Governu sei apresenta proposta Orsamentu Jerál Estadu 2020 no 2021 iha tempu besi-besik malu. Iha oportunidade ida ne'e, ami hakarak sujere atu Distintu/a sira diskute kle'an liu, promove partisipasaun entidade relevante sira durante iha diskusaun ka iha audiénsia públika.

Ami husi La'ó Hamutuk sempre prontu atu oferese ami nian kontribuisaun analítiku hodi hadi'ak liu tan proposta Lei OJE rua molok debate no aprova iha plenária Parlamentu Nasionál.

Espera katak povu ne'ebé merese liu atu hetan tulun husi estadu labele adia tan ba tempu inserteza iha futuru, maibé tempu ona atu investe duni ba diresaun loloos hanesan ami mensiona iha leten atu akomoda direitu no interese sidadaun sira ne'ebé vulneravel no merese liu atu hetan apoiu. Prosesu OJE nudár oportunidade di'ak atu diskute no decide hodi harii aliserse ekonomia produtivu no sustentável hodi garante moris di'ak ba povu hotu.

Dala ida tan, ami promete prontidaun atu ajuda Distintu/a sira hodi lee, identifika, analiza dokumentu sira OJE nian no dadus relevante sira hodi hato'o ba ita-boot sira antes tama ba iha diskusaun no aprovasaun.

Mak ne'e de'it karta husi ami, ba atensaun no kolaborasaun hato'o obrigadu barak.



Adilsonio da Costa Junior Marta da Silva.
Ekipa koor denasaun La'ó Hamutuk